



JUDICIAL SYSTEM MONITORING PROGRAMME PROGRAMA MONITORIZASAUN SISTEMA JUDISIAL

Aktualizasaun Justisa

Edisaun : Marsu 2010

Periodu : Marsu 2010

Importansia Prezensa Lei Kontra Violénsia doméstika iha Timor Leste

Urjensia no Fundamentu Prezensa Lei Violénsia doméstika

Maske iha diversidade opinoinis no posizaun kona-ba proposta Lei Kontra Violénsia doméstika maibe, urjensia nesiedade, realidade sosial no eijensia konstitusional inklui obrigasaun tuir lei internasional, JSMP enkoraza Distintus Membru Parlamentu Nasional atu aprova lalais Proposta Lei Kontra Violénsia doméstika atu kumpri obrigasaun Estadu Timor Leste tuir:

- Artigu 6 (j) Konstituisaun da Republika ne'ebé defini katak: Objetivu ida hosi Estadu Timor Leste nian mak: atu hamoris/kria, promove, no garantia biban no leet ne'ebé hanesan ba fetu ho mane;
- Artigu 9 (2) Konstituisaun da Republika ne'ebé defini katak: Norma sira ne'ebé mai iha konvensaun, tratadu ka akordu internasional sira nia laran vigora iha ordem rai laran nian, wainhira hetan ona aprovasaun, ratifikasaun ka adezasaun hosi orgaun kompetente ida-daik no wainhira publika tiha ona iha jornál ofisiál.
- Artigu 16 (1) no (2) Konsituisaun da Republika ne'ebé defini katak sidadaun hot-hotu hanesan iha lei nia oin, no mós iha direitu no obrigasaun hanesan. Iha alinea segundu defini katak: La bele halo diskriminasaun ba ema ida tanba nia kulit, nia rasa, nia estadu sivil, nia sexu, orijen étniku, nia lia no sel-seluk tan.....!
- Liu-liu iha Artigu 17 Konstituisaun da Republika defini katak: Fetu ho Mane iha obrigasaun hanesan iha moris familia, kulturál, sosial, ekonomiku no politiku nia laran¹;
- Kovensaun CEDAW no observasaun jeral Komite CEDAW ba relatoriu inisial Estadu TL, iha nia nia rekomendasaun spesifiku ba asuntu Asesu ba Justisa no Violénsia Hasoru Fetu subliña katak: Rekomendasaun Nu. **21**; Komite preukupa katak, maski fetu sira nia asesu ba justisa hatur ona iha lejislasaun, sira nia abilidada iha prátika atu realize direitu ida ne'e no lori kazu diskriminasaun sira ba iha tribunal limitadu tanba fatór sira hanesan analfabetismu, bareira ba lian, prátika sira ne'ebé difikulta sira nia asesu ba tribunal, sistema justisa; tradisional sira ne'ebé sei iha, kustu judisiariu sira, lai iha informasaun kona ba sira nia direitu no la iha assistensia; atu buka tuir sira nia direitu. Tuir mai, rekomendasaun Nu.22 Komite husu ba parti Estadu atu hola medidas apropriadu sira hotu atu hasai impedimentu sira ne'ebé fetu sira hasoru atu hetan asesu ba justisa, no atu aseguira katak autór sira judisiariu konhese didiak kona-ba Konvensaun ida ne'e no obrigasaun sira hosi Estadu nian. Komite husu ba Estadu membru atu fo servisu assistensia legal, implementa programa letradu legal no desamina koñesementu oinsa atu utiliza remédiu legal ne'ebé iha kontra diskriminasaun, no mos atu halo

¹ Hare mos provisaun konstitusional sira seluk ne'ebé implisitamente defini kona-ba obrigasau Estadu Timor Lesre atu garante no proteze sidadaun sira hosi kualker forma violénsia no promove igualidade jeneru no partisipasaun ba prosesu dezemvolvimentu nasional;

monitorizasaun ba rezultadu sira ba esforsu sira ne'e. Komite enkoraja Estadu Membru atu buka assistensia husi komunidadadi internasional atu bele implementa medida sira ne'ebé iha prátika, bele hametin fetu sira nia asesu ba justisa.

- Nune'e mos iah rekomedasaun Nu. 29 kona-ba Violénsia Kontra Fetu: Maski Komite CEDAW fo apresiasaun ba ratifikasaun Kódigu Penal 2009, ne'ebé kriminaliza krimi seksual sira, trata krimi sira ne'e hanesan violasaun ba fetu nia direitu ba siguransa isin lolon no integridadi umanu no asegura katak prosedimentu kriminal la depende ba iha keixa, maibe Komite nafatin lamenta katak delegasaun la bele responde Komite nia pergunta kona ba kriminalizasaun violasaun seksual kaben nian iha Kódigu Penal foun nia okos no ***lamenta katak ratifikasaun proposta da Lei kona ba violénsia doméstika adia kleur tebes***. Komite preukupa ho ezistencia forma violénsia barak kontra fetu sira, partikularmente violénsia seksual no violénsia doméstika, no la iha informasaun kona ba fenomenu balu. Liu tan Komite preukupa katak kazu sira violénsia doméstika rezolve liu husi métodu tradisional sira, inklui mediasaun.
- Aleinde preukupa ho Komite CEDAW nia rekomendasaun, JSMP mos rekoñese katak provizaun kona-ba violénsia doméstika ne'ebé preve implisitamente iha lei kodigu penal aplikavel, seidauk bele garante protesau masimu ba vítima fetu no labarik liu-liu vítima violénsia doméstika ;

Intrudusaun

Asuntu violénsia doméstika nu'udar fenomena sosial ka asuntu fenomenal ida ne'ebé eziste dezde tempu uluk to'o ohin loron. Asuntu ne'e kontinua hamosu pro-kontra, no sai nu'udar problema sosiál ne'ebé kompleksu liu hotu iha tempu agora. Aleinde nia kompleksidade, motivu no karakteristiku violénsia doméstika mos diferente entre rai ida ho rai sira seluk, maibe la limite ba fronteira jeográfiku no klase sosial, nivel edukasaun, no entre estadu modernu sivilizadu sira ho estadu pre-dezemvolvidu ka dezemvolvidu sira ne'e. Tanba ne'e mak ohin loron asuntu violénsia doméstika konsidera mos nu'udar virus universal ne'ebé preukupa sosiedade iha mundu rai klaran. Asuntu violénsia doméstika kontinua hamosu pro-kontra tanba hosi fatin ka rai balun konsidera katak pratika violénsia hasoru fetu no labarik nu'udar pratika ne'ebé lejítimu no legal tanba influensia hosi pratika kulturál balun ne'ebé konsidera no hatur nu'udar objeitu ka patrímoniu sosiedade nian.

Ita hotu konsiente no la ignora katak iha realidade tantu fetu no mane inklui labarik bele sai hanesan vítima ba violénsia doméstika. Maske nune'e, iha faktu no estudu bar-barak mak hatudu katak fetu no labarik mak dalabarak liu iha potensia atu sai vítima husi violénsia tanba pratika sosial no kultural balun ne'ebé marjinaliza, diskrimina no izola sira atu hetan oportunidade ne'ebé hanesan ho mane. Situaun hirak lori sira to'o ba iha pozisaun ida ne'ebé vulneravel liu iha sosiedade laran. La'os to'o ba ne'e deit, tanba kauza husi situaun sira ne'e hotu, dala barak fetu no labarik hasoru frustasaun, dezesperadu/*putus-asa*, eksploitadu, hasoru pratikaabuzu de poder, no simu estereotipu jéneru sira seluk ne'ebé implika ba sira nia personalidade, integridade pesoal no aspeitu sosial umanu sira seluk. Pior liu tan, tanba to'o ohin loron la iha mekanismu

sosial ka legal-formal apropriadu ida ne'ebé bele neutraliza no koresponde ba situasaun fetu no labarik sira ne'e infrenta violénsia no presau psikologis tanba esperiensa violentu ne'ebé sira simu. Maske, rekoñese katak iha ona provizaun legal balun regula kona-ba violénsia doméstika maibe provizaun sira ne'e sei nakloke ba intepretasaun oi-oin tanba provizaun hirak ne'e la regula espesíficamente kona-ba violénsia doméstika .

Refleta ba situasaun sira ne'e hotu, maioria fetu ne'ebé mak sai vítima ba hahalok violénsia doméstika decide atu lakohi prosesa sira nia kazu liu husi prosidimentu legal ne'ebé mak iha, tanba aleinde konfronta problema *beban psikologis*, limitasaun koñesimentu kona-ba prosedimentu sira, stigma sosial, komprensaun kona-ba konseitu violénsia doméstika nu'udar problema privadu liu ne'ebé mak la merese atu ema hotu ka públiku atu hatene. Nune'e mos problema seluk ne'ebé sira preukupa mak pratika lei ne'ebé birokratiku no dalabarak liu revitimiza fetu sira nia situasaun tomak.

Bazeia ba situasaun hirak ne'e hotu, mezmu sira hakarak tebes atu resolve sira nia kazu, maibe maioria hili liu dalan mediasaun ka prosesu tradisionál ne'ebé mak dalabarak la fo vantagen no justisa ida ne'ebé mak justu no pro ba fetu vítima sira nia interese. Iha parte seluk, protesau no garantia ne'ebé mak lei fo, liu-liu Kódigu Penál no provizaun legal sira seluk ba asuntu violénsia doméstika mos seidak masimu, tanba provizaun sira ne'ebé iha relasaun ho violénsia doméstika ne'e sei regula jeral deit.

Bazeia ba observsaun no monitorizasaun JSMP nian hatudu katak numeru violénsia doméstika no forma violénsia sira seluk kontra fetu sei sa'e maka-as iha teritoriu Timor laran tomak. Situasaun ne'e bele prova liu hosi numeru kazu violénsia doméstika no violénsia sira seluk kontra fetu ne'ebé mak rezista iha Tribunal Distrital hotu² nomos ba kazu sira ne'ebé mak Unidade Suporta ba Vítima atende,³ hatudu katak violénsia kontra fetu liu-liu violénsia doméstika sai nu'udar violénsia ida ne'ebé mak aas liu iha Timor-Leste.

Konsidera realidade fetu nia moris iha familia no sosiedade ne'ebé mak sei sai nafatin vítima ba hahalok violénsia no diskriminasaun, tanba ne'e tuir JSMP nian hanoin katak merese no nesesariu atu estabese duni mekanismu formal ida hodi regula no fo protesau ba vítima sira violénsia doméstika no hasai fetu husi situasaun vulnerabilidade sira ne'ebé haktuir ona iha leten.

Provizoens Legal Sira iha Konstituisaun

Nu'udar estadu de direitu demokratiku⁴, Timor-Leste iha obrigasaun instituisonal nu'udar estadu hodi fo protesau no garantia ba direitu no liberdade ne'ebé egual ba sidadaun hotu-hotu sein

² Relatoriu observaun jeral ba sistema judisiariu JSMP/estatistika kazu violénsia bazea ba Jéneru

³ Relatoiu observaun jeral ba sistema judisiariu JSMP/estatistika kazu ne'ebé mak VSS atende

⁴ Artigu 1 no 2 Konstituisaun RDTL

diskriminasaun tuir prinsipiu hirak ne'ebé konsagradu iha Konstituisaun da República. Prinsipiu hirak ne'e inklui; "ema hotu-hotu hanesan iha lei nia oin no iha direitu no obrigasaun hanesan⁵, garantia ba igualdade jéneru,⁶ protesaun ba labarik,⁷ no direitu ba liberdade no seguransa, integridade ema ida-idak nian no atu livre husi tratamentu aat.

Aliende ida ne'e konstituisaun mos garante protesaun ba familia ka uma kain tamba sai hanesan baze selular iha sociedade. Provizaun Konstitusional hirak ne'ebé mak estipula iha konstituisaun sai hanesan baze atu estadu liu husi nia orgaun kompetente sira atu halo ka hari'i mekanismu ida ne'ebé adekuada hodi proteze sidadaun sira husi kualker forma hosi violénsia no diskriminasaun liu husi instrumentu lei.

Mudansa no Ejjensia Global kona ba Afirmasaun Protesaun ba Direitus Umanus

Iha parte seluk, maske konsidera katak importante atu Estadu TL nafatin promove, proteze, no asegura kultura ka lisan no pratika kultural Timor nian nu'udar parte integral hosi indentidade no patrimoniu sosial sociedade Timor Leste nian, maibe nafatin tenke refleta saida mak konstituisaun rasik defini katak pratika no kustumi hirak la bele kontrariu ho konstituisaun no prinsipiu sira direitus umanus ne'ebé adopta universalmente iha mundu rai klaran. Tuir JSMP, Timor Leste, sai indepedente iha era modernu no globalizadu, tanba ne'e nu'udar estadu demokratiku iha era no dekade ida ohin loraun, Timor Leste la iha fatin no razaun atu bele izolalan husi pratika internasional sira ne'ebé ejije konsiderasaun atu hakotu pratika kultural sira ne'ebé *kadaluarsa ka expire* ona no la refleta espíritu dekade ohin loraun nian ne'ebé refleta dekade ba paz, justisa no la-iha deskriminasaun). Violénsia no forma diskriminasaun hasoru grupu balun iha sociedade laran nu'udar pratika ka kultura ne'ebé "atrazadu" iha mundu era ohin loraun nian. Tanba ne'e, reasaun, argumentu no preukupasaun sira ne'ebé mosu atu defende no promove valor kultural, persiza deskuti no elaborasaun klean atu hare valores kultural ida ne'e persiza promove no ida ne'ebé tenke husik tanba la refleta ona realidade ohin loraun nian.

Limitasaun Provizaun Violénsia doméstika iha Kódigu Penál Aplikavel

Kódigu Penál ne'ebé mak sai nu'udar sumbriña no sentru ba lei no materia penal sira seluk regula mos kona ba violénsia doméstika no agresaun ne'ebé mak halo husi ema ida ba ema seluk, maske la regula espesifikamente. Kodigu Penal ne'e rasik la defini eksplisitamente kona-ba termu violénsia doméstika tuir termu ne'ebé dezemvolve no defini iha proposta Lei Kontra Violénsia doméstika. Maske nune'e, artigu ne'e defini kona-ba "maus tratus ba kónjuje."⁸ Iha artigu ne'e defini katak "*ema ne'ebé pratika maus tratus fiziku ka psíkika ba nia kónjuje ka ba ema ne'ebé moris ho nia hanesan feen ho laen sei hetan pena prizaun tinan 2 too tinan 6 kuandu dipozisaun legal seluk la preve pena todan liu*"⁹. Maske artigu ne'e dala ida tan, la defini

⁵ Artigu 16 Konstituisaun RDTL

⁶ Artigu 17 Konstituisaun RDTL

⁷ Artigu 18 Konstituisaun RDTL

⁸ Artigu 154 Kodigu Penal:

⁹ Versaun tradusaun ofisial hosi Presidente Tribunal Rekursu.

eskplicitamente kona-ba krimi violénsia doméstika maibe elementus sira iha artigu ne'e konstitui no representa ona rekejitus no elementus sira kona-ba krimi violénsia doméstika nian. Maske nune'e, iha JSMP nia esperensia ba kazu sira ne'ebé involve arguido no vítima sira ne'ebé tama iha kategoria feen ho laen, iha tendensia katak Ministeriu Publiku refere liu ba artigu 145 ne'ebé defini kona-ba "ofensa ba integridade fízika simples" ne'ebé nia natureza submete ba krimi semi publiku.

Obrigasaun Timor Leste tuir Lei internasional

Deklarasaun Universal Direitus Umanus estabelese prinsipiu sira ne'ebé mak garante ema hotu-hotu bele moris ho dignidade no respeito ba nia direitu no liberdade. Nu'udar Estadu membru ba Organizasaun Nasoins Unidus, Timor Leste, mos la bele hases aan hosi nia responsabilidade nu'udar membru comunidade internasional hodi hatudu Timor Leste nia obidesimentu ba prinsipiu hirak ne'e. Aleinde ne'e, nu'udar mos Estadu ida ne'ebé mak ratifika ona konvensaun internasional,¹⁰ hanesan Konvensaun Direitu Sivil no Politiku, Konvensaun Direitu Ekonomia Sosial no Kultural, no liu-liu Konvensaun ba Eliminasau Formu Diskriminasaun Hotu Kontra Feto ho nia protokolu opsional. Tuir mai, artigu balun iha konvensaun CEDAW ne'ebé koalio spesifiku kona ba asuntu eliminasaun diskriminasaun no violénsia hasoru fetu mak hanesan:

- Artigu 2, ne'ebé obriga Estadu Membru sira atu adopta lei ne'ebé lolos no medida seluk tan, hanesan sansaun ne'ebé los, hodi bandu diskriminasaun kontra fetu. Tanba Konvensaun ne'e defini katak violénsia kontra fetu nu'udar pratika diskriminasaun no forma ida hosi violénsia hasoru fetu. Tanba ne'e, artigu refere, fo responsabilidade estadu Timor-Leste nu'udar Estadu Membru ba Konvensaun ne'e, hodi adopta lei atu bandu aktu sira ne'ebé refleto krimi violénsia doméstika;
- Tuir mai iha Artigu 5(a) CEDAW defini mos katak: Estadu Membru sira atu muda modelu ka padraun sosial no kultura kona ba fetu no mane nia hahalok, atu nune'e bele halakon prejuizu kustume no pratika barak seluk tan ne'ebé bazea ba idea inferioridade ka superioridade fetu no mane. Signifika katak estadu Timor-Leste iha obligasaun atu muda kultura ne'ebé halo situsaun fetu ho mane nia valor la-hanesan liu husi approva mekanismu hanesan lei violénsia doméstika.
- Artigu 16(1) ne'ebé klarifika katak nasaun membru tenki hola medida hotu ne'ebé los atu halakon diskriminasaun kontra fetu iha materia hotu ne'ebé iha relasaun ho kaben no relasaun familia no liu-liu tenki garanti hodi bazeia ba fetu no mane nia igualidade. Ne'e signifika katak Timor-Leste tenke adopta mekanismu hanesan lei violénsia doméstika ne'ebé bele garantia protesaun igualidade fetu ho mane iha familia.

Aleinde ne'e, iha Komite CEDAW nia rekomendasaun geral numero 19, artigu 24 mos rekomenda katak estadu tenke:

¹⁰ Artigu 9 Konstituisaun RDTL

- (a) Halo medida effektivu atu hapara violénsia bazeia ba jeneru, iha fatin publiku no privadu
- (b) Halo lei atu fo'o protesaun ne'ebé forte ba fetu kontra violénsia iha familia.

Rekomendasau Importante no prinsipal seluk hosi Komite CEDAW atu resposta ba Timor-Leste nia relatoriu inisial ne'ebé entrega iha tinan 2009. Iha artigu 30, Komite rekomenda katak estadu Timor-Leste tenke:

“Komite rekomenda ba Estadu Membru sira atu lalais ratifika Lei ba Violénsia Doméstika no halo oficial públiku no sosiedadi sira bele hatene liu tan no halo monitorizasaun ba ninia efektividade.”

Tuir konvensau ne'e ho kada konvensau sira seluk ne'ebé Estadu parte sira ratifika tenke estabelese mekanismu ne'ebé adekuaudu atu bele garante implementasaun prinsipiu sira ne'ebé haktuir iha kada konvensau sira ne'e nia laran nu'udar obligasaun instituisonal husi Estadu Membru sira. Konvensau sira ne'e mos tula obligasaun ba Estadu Membru atu harii no kria kondisaun tuir lei ne'ebé bele garante prinsipiu sira tama iha pratika hodi elimina pratika tradisionais sira ne'ebé kontrariu ho prinsipiu sira hosi kada konvensau ne'e inklui violénsia no diskriminasaun hasoru fetu, labaraik ka grupu vulneravel sira seluk.

Konseitu Violénsia doméstika iha Proposta Lei Kontra VD

Tuir artigu 3(1) hosi Proposta de Lei ne'e, defini katak Konseitu ka definisaun kona-ba Violénsia doméstika mak: *refere ba kualkér asaun ka asaun lubuk ida ne'ebé komete ona iha situasaun familiár nian husi membru família ida kontra membru ida ka ninia membru sira seluk ka husi ema ida ne'ebé iha relasaun íntimu ho ida seluk, ne'ebé rezulta, ka bele rezulta estragus ka sofrimentu fíziku, seksuál ka psikolójiku, violasaun ekonómiku no mós ameasa mak hanesan asaun intimidatóriu, violénsia fíziku, agresau, koersau, asédiu ka privasaun arbitrária liberdade nian. Iha alinea segundu hosi artigu ne'e mos subliña liu tan katak, violénsia doméstika ne'e inklui, maibé la limita ba asaun hirak tuir mai ne'e:*

- a) *Violénsia fízika refere ba asaun hirak-ne'ebé provoka moras, moras ka kanek boot, no mós violénsia korporál ka fíziku;*
- b) *Violénsia seksuál refere ba asaun sira ho natureza seksuál nian, ne'ebé komete tiha kontra fetu ida ka kontra individu ida, ne'ebé moris iha kontestu familiár;*
- c) *Violénsia psikolójika refere ba asaun hirak-ne'ebé ho finalidade provoka ta'uk, lakon fiar-an, lakon kapasidade atu halo atusaun, sentimentu sira laiha esperansa nian, ka sentimentu sira ne'ebé bele kauza sofrimentu mentál ka emosionál ba vítima;*
- d) *Violénsia ekonómiku refere ba asaun sira ne'ebé prevene individu ida iha situasaun familiár, ne'ebé limita no/hatau individu ne'e atu hala'o servisu ho loloos iha uma-laran ka sai ba li'ur, hanesan ne'e tau ema ida kontrola vítima ne'e, ka nega ka ameasa hodi nega fetu ida ka ninia oan sira, ho apoiu finanseiru ne'ebé iha, tuir lei ba ninia família, ka fó apoiu finanseiru ida ne'ebé la natoon ba fetu ne'e nia oan sira;*
- e) *Prátika kulturál no tradisionál sira ne'ebé tau fetu sira iha perigu, liuliu sira ne'ebé iha violénsia no abuzu nian, refere ba asaun sira ne'ebé mantein fetu sira iha knaar ne'ebé*

hakru'uk iha relasaun ho mane sira no hatau feto sira-nia kbiit hodi goza direitu no liberdade sira, ne'ebé iha direitu atu hamriik hanesan ho mane sira.

Tuir JSMP nia hanoin katak konseitu ne'e akomodativu teb-tebes tanba bele reprezenta no kobre situasaun hot-hotu hosi esperensia no tipu violénsia ne'ebé vítima sira hosi krimi violénsia doméstika infrenta durante ne'e. Tanba aleinde defini no klarifika kestaun kona-ba relasaun familiar ne'ebé durante ne'e sai problema, proposta lei ne'e mos hatur no klarifika diak liu forma sira violénsia doméstika. Iha periodu antes ne'e, iha difikuldade boot tebes ba vítima sira ne'ebé hetan problema psikologis barak tanba implikasaun ka kauza husi violénsia doméstika ka agresaun fíziku hosi loron ba loron ne'ebé sira simu, maibe sira la hetan reposta pozitivu tanba lei la defini klaru kona-ba kestaun ne'e.

Maske nune'e se'e ita hare fali ba objetivu hosi proposta lei ne'e bazeia ba Artigu 1 (1) defini katak lei ne'e nia objetivu mak atu kria no hametin mekanizmu sira ba prevensaun violénsia doméstika nian no promosaun direitus vítima/sobrevivente sira-nian, hanesan mós fó protesau legal ba vítima sira violénsia doméstika nian. Iha alinea (2) definia kona-ba *Estadu iha obrigasaun atu prevene, investiga no halo reparasaun ba violasaun sira direitus umanus nian, inklui violénsia kontra feto, husi ajente sira Governu no Privadu nian. Ida-ne'e bele alkansa liu husi:*

- a. Harii sistema prevensaun ida hodi bele halakon ka hamenus prátika sosiál ka família ne'ebé halo violénsia doméstika;*
- b. Fó asisténsia ba família sira no ema individuál ba situasaun ida ne'ebé iha risku ka tensaun para evita nesesidade atu uza violénsia;*
- c. Prevensaun ba asaun sira violénsia nian ne'ebé regularmente mosu iha família sira, ne'ebé iha tensaun no hodi limita konsekuénsia sira ne'ebé mai husi violénsia ne'e;*

Tuir JSMP nian interpretasaun, JSMP hanoin katak proposta lei laos deit atu tula responsabilidade kriminal ba arguidu sira maibe liu-liu proposta de lei ne'e nia objetivu atu estabelese medida preventivu ba violénsia no ejije responsabilidade kolektiva hosi entidades hot-hotu tantu governu no sosiedade sivil hodi servisu kolektivamente ba prevensaun violénsia doméstika ho konsistente tuir padraun internasionál sira direitus umanus nian.

Aleinde medida preventivu no protetivus tuir proposta de lei ne'e, iha klauzula seluk ne'e defini kona-ba prinsipi fundamental sira hosi proposta da lei ne'e¹¹. Tanba ne'e, tuir JSMP nia hanoin, dala ida tan lei ne'e estabele ho intensaun prinsipal atu hametin unidade familiar, promove kultura non-violénsia, kultura igualidade no respeitu ba malu nu'udar kriatura uma ne'ebé moris iha sosiedade dekade modernu, sivilizadu no globalizasaun.

Lei ne'e nia importansia

Desde inisiu no ba to'o faze debate no votasaun iha plenariu sesaun jeneralidade sei kontinua iha pozisaun pro-kontra kona-ba prezensa lei ne'e iha Timor Leste. Pozisaun hirak ne'e eziste tanba bazeia ba doutrina no pratika kultural balun ne'ebé oras ne'e sei nafatin ita opta hanesan valores no patrimonia social sosiedade Timor nian.

¹¹ Hare iha Artigu 5 to'o 10 Proposta Lei Kontra Violénsia doméstika

Iha parte seluk, hanesan mos haktuir ona iha leten katak nu'udar membru ba comunidade internasional, Timor Leste la bele ses-an hodi la obedese no la hakru'uk ba valores demokrasia, igualidade non-deskriminasaun, kultura non violénsia no valores umanut seluk ne'ebé maioria comunidade iha mundu rai klaran tomak provome no hahi nu'udar valores umanidade ne'ebé hahi ass tebes hosi comunidade internasional.

Aleinde ejijensia comunidade internasional hirak ne'e, nu'udar estadu demokratiku ho baze estadu de direitu, Estadu Timor Leste iha dever no responsabilidade instituisonal atu proteze sidadaun sira husi kualker forma violénsia no diskriminasaun hosi grupu ida ba sira seluk. Liu tan ,estadu mos iha obrigasaun atu hari'í mekanizmu instituisional ne'ebé bele garante no proteze sidadaun sira hosi violénsia ka forma sira seluk ne'ebé viola sidadaun sira nia direitu. Maibe se wainhira estadu falla atu kumpri nia obrigasaun ka la konsegue halo ida ne'e, maka estadu tenke hari'í mekanizmu seluk hodi fo kastigu ba autóres kriminozu sira. Maske nune'e, medida fo kastigu nu'udar medida *ultimum remidium* ka reseita ikuskuandu medida sira seluk la konsegue atu implementa.

Maske nune'e, bazeia ba esperensia real moris fetu nian iha familia, sosiedade ka iha fatin publik ka partikular sira seluk, grupu fetu no labarik sei kontinua tama iha grupu ne'ebé vulneravel atu hetan violénsia no sofre ka sai vítima ba violasaun (fisika, seksual no psikolojiku) iha nivel strata sosial ka klase sosial saida deit. Tanba ne'e, pasu ne'ebé Estadu hola liu hosi politika lejizlasaun Lei Kontra Violénsia doméstika nu'udar pasu politiku ne'ebé rasional husi Estadu atu kumpri nia obrigasaun hodi responde ba fenomena sosial ne'ebé provoka preukupasaun global ka universal iha iha era ida ohin loron nian.

Persija mos kompriende katak proposta Lei ne'e wainhira tama ona iha vigor, la'os atu fo protesau deit ba fetu, maibe ba membru familia hotu ne'ebé iha relasaun tuir definisaun lei refere iha Artigu 3 Proposta Lei ne'e. Maske nune'e, tanba realidade sosial ita nian subliña liu situasaun fetu no labarik nia vulnerabilidde hosi pratika sosial sira, nune'e lei ne'e atu hatan ba situasaun hirak ne'e.

Refleta ba realidade hirak ne'e, JSMP hanoin katak proposta lei violénsia doméstika ne'e importante liu no urjente liu atu intrudus tanba bazeia ba observasaun no monitorizasaun JSMP nian, deskobre, katak numeru violénsia doméstika aumenta ba bebeik, husi tempu ba tempu maibe la iha mekanizmu legal ida ne'ebé apropriadu atu responde ba situasaun hirak ne'e. Mesmu iha parte seluk provizaun lei Kódigu Penál fornese artigu balun kona-ba natureza krimi violénsia doméstika, maibe provizaun hirak ne'e defini em jeral deit no poir liu lei ne'e seidak implementa apropiadamente hodi hatan ba violénsia doméstika tuir artigu ne'e nia intensaun.

JSMP mos preukupa katak nu'udar sidadaun ne'ebé mak sempre hetan violénsia no sai hanesan ema ne'ebé mak vulneravel liu iha aspetu domestika ka uma laran, persija atu hetan protesaun husi lei no husi mekanismu ne'ebé mak estadu estabelese, tanba feto no labarik nu'udar parte integral hosi sidadaun Timor Leste ne'ebé mak iha direitu atu hetan protesaun hosi kualker tipu ka forma violénsia hasoru sira nia liberdade no integridade personal.

Nune'e mos, JSMP hanoin katak proposta de Lei Kontra Violénsia doméstika laos atu destroi unidade familia hanesan ema ka entidade no individu balun preukupa, maibe atu fo garantía fundamental ba integridade no unidade familia nian ne'ebé mak bazeia iha respeito ba prinsípiu direitus umanus no kriatura umanu hanesan estipula iha artigu 5 esbosu lei ida ne'e.

Bazea ba situasaun hirak iha leten, JSMP propoin atu Parlamentu Nasional bele aprova lalais lei Violénsia doméstika hodi bele fornese protesaun ne'ebé progresivu no komprehensivu liu ba feto Timor-Leste ne'ebé mak dala barak sai vítima ba violénsia doméstika, maske konsiente mos katak laos ho instrumentu lei deit hodi realize justisa ne'ebé mak diak iha Timor-Leste.

Atu hetan informasaun kle'an, favor kontaktu:

Luis de Oliveira Sampaio

Diretur executivu JSMP

Email: luis@jsmp.minihub.org

Landline: +670 3323883